

■ TRIBUNA POLITICA

Da l'antierur dretg tutelar al nov dretg da la protecziun d'uffants e da creschids

Ina emprima bilantscha intermediara

DA CHRISTIAN RATHGEB,
CUSSEGLIER GUVERNATIV

Il 1. da schaner 2013 è entrà en vigur il nov dretg da la protecziun d'uffants e da creschids che ha remplazzà il dretg tutelar vegl.

Las prescripziuns dal dretg federal èn vegnidas realisadas en il chantun Grenchun d'in team da project sut la direcziun dal departament da giustia, segirezza e sanadad (DGSS). Entaifer fitg curt temp ha quest team installà in'autoritad competente cun in'organisaziun efizienta e procurà che las lavurs da legislaziun èn vegnidas terminadas a temp.

In giavisch central è ch'il nov dretg vegnia applitgà tras autoritads spezialisadas professionalisadas ed interdisciplinaras. Las tschintg novas autoritads per la protecziun d'uffants e da creschids (Apuc) han cumenzà cun lur lavur il 1. da schaner 2013. Circa la mesadad da las totalmain var 50 collavuraturas e collavuratur da las novas Apuc han gia lavurà per las anteriuras autoritads tutelaras. L'autra mesadad èn persunas che derivan d'autras professiuns e che s'aprofundeschan anc intensivamain en quest nov sector giuridic. A partir da l'atun 2012 han gi lieu scolaziuns intensivadas per las collavuraturas ed ils collavuratur da las Apuc. L'interess è stà fitg grond.



Las Apuc han actualmain fitg blera lavur. En il mingadi sa tracti en spezial da realisar il nov dretg cun per gronda part novas collavuraturas e novs collavuratur, d'exercitar las novas structuradas ed organisaziuns, da sclerir las interfatschas e las rollas dals partenaris da collavuraziun (p. ex. SPGR, autoritads socialas, scolas e.u.v.). Ultra da quai ston vegnir repassadas las mesiras dal dretg vegl e fin il pli tard la fin da l'onn 2015 vegnir modifitgadas a mesiras dal dretg nov.

La direcziun da las Apuc che sa cumpona da la directura e dals directurs da las tschintg Apuc è in gremi important per svilupper ina pratica unitara e per armonisar las proceduras da dretg. Ella ha gia elavurà numerus projects e diversas directivas. La direcziun da las Apuc stat er regularmain en contact cun la dretgira chantunala sco instanza da surveglianza giudiziala e cun il DGSS sco autoritad da surveglianza administrativa.

Las partenarias las pli importantas da collavuraziun per las Apuc èn las curatellas professiunalas (pli baud avugadias uffizialas). Las curatellas professiunalas – sco er las procuraturas privatas ed ils procuratur privats – exequeschan lur mandats per incumbensa da las Apuc ed èn sutmessas a la surveglianza ed a las instrucziuns da quellas. Las Apuc organischan er scolaziuns e furmaziuns supplementaras per las curatellas professiunalas, las cusseglias e sustegna. Tenor las reacziuns fin ussa funcziuna la collavuraziun sin basa da mandats tranter las Apuc e las curatellas professiunalas fitg bain. Actualmain stat en il center l'instrucziun da las curatellas professiunalas tras las Apuc davart ils novs andaments da las proceduras e davart las implicaziuns dal nov dretg.

Igl era da spetgar ed è sa cumprovà ch'i dovra anc ses temp fin ch'ils differents novs temas èn daventads rutina. Far quint cun in «courant normal» pon ins probablmain a partir da l'onn 2015. Tenor il DGSS sco autoritad da surveglianza administrativa è il stadi actual – malgrà tut ils problems e las difficultads – bun. Quai po vegnir attribui al grond e meritaivel engaschament da tut las collavuraturas e da tut ils collavuratur da las Apuc.